

**■ COLUMNA**

# Far entiert – ina tactica senza avegnir

DA BERNARD CATHOMAS

**F**ar midadas va vess. Ins sa dosta encunter uschè ditg sco pussaivel, magari cun tut ils meds, corrects e main corrects. Ils experts per midadas distinguan 5 fasas davent da l'entschatta fin l'acceptanza.

**L**'emprim vegn la midada ignorada. Ins prenda simplamain betg enconuschientscha ch'insatge nov sa fa.

**A**lura vegn la novaziun Adiscreditada. Exempels ord nossas regiuns: Ina portgaria, quests autos (scumond en il GR). Ina catastrofa, quests motors da segar che segan miserabel. Idiotic, quests snowboards che fan empaglia las pistas. Pura canera, la musica nova. In bastard, quest rumantsch grischun, Rertortenbaby.

**S**che quai na basta per liquidar, vegnan ils promoturs dal nov vidlonder. Engianaders, manzasers, manipuladers, tips cun stils malonest. Sche pussaivel vegnan las nauschadads focussadas sin ina persuna; igl e pli simpel da diabolisar in che blers, sco auters exempels mussan.

**S**urviva la novaziun er quella fasa, entschaiva l'acceptanza. E la finala smirvegljan tuts ch'ins era insacura talmain encunter insatge ch'è uschè normal.

**J**au sai da tge che jau discurrel, sche jau legel tge che vegn il mument ditg dal rumantsch grischun. Jau na poss e na vi snegar che jau sun l'iniziant da quest project e che jau hai



preparà e realisà bleras decisziuns per far e derasar el. Jau sun satisfatg da questa lavur. Nagins da mes presidents ni da mias supranstanzas ni dals organs da controlla da tut las instituziuns che jau hai lavurà han insacura constatà tar mai acziuns nuncorrectas. Vegnir suenter onns e pretendere il cuntrari senza mussaments qualifitgescha avunda quels che fan quai. En particular cumprovan ils protocols da la supranstanza LR er in'incumbensa explicita per lantschar il rg. Er tar nus – e betg mo tar il von e zu Guttenberg – èsi pia bun dad esser precaut cun citar lavurs da docter.

**I**vegn pretendi ch'il rumantsch grischun progredeschia, perquai ch'ins haja ludà el sur mesira e mal interpretà retschertgas en la gasetta. Quai fiss l'emprim project ch'avess success, perquai che ses exponents pretendan ch'el saja pli acceptà che quai ch'el è. Uschè fitg na crai nossa gliעד betg «a quels da Cuir» – ed a las gasettas. Fiss in pau bler onur.

**I**l rumantsch grischun concritescha in'idea ch'existiva gia daditg, dapi propostas dad in Josef Planta ed in pader Placi a Spescha avant radund 200 onns. Ils onns 1980 è bler vegnì ensemen che ha gidà a realisar quest project: il spiert per midadas da lez temp, il basegn pratic dad avair in linguatg scrit surregional, ils dretgs filologs, ina giuventetgna averta per novs projects, instituziuns iniziatives.

**F**ranc è ch'il rumantsch grischun na ha betg gi success pervia da sbagls, mabain pervia da quai che blers han fatg e fan anc oz bain. Sco tar tut las midadas datti er qua da quai che fa fadia dad acceptar, che disturba u che fa schizunt in pau mal. Da quai duai ins discurre e trair las conclusiuns. En sasez pudess quai esser pussaivel senza far entiert ed insultar.

**N**i èsi propi sco Gion Deplazes di insanua che la Rumantschia haja ina lunga tradiziun da far entiert? Fiss in trist fatg – che stgatscha la gliעד e privescha la cuminanza da ses potenzial.